

# JEDAN GRAD, JEDNA BORBA

Piše ko zna, smije i umije; izlazi kad treba i mora; štampa se u kućnoj radinosti.

## BITKA ZA ZDRAVSTVO!

Nakon prvog zasjedanja Antifašističkog vijeća narodnog oslobođenja Jugoslavije (AVNOJ) u Bihaću, fašističke trupe, predvođene njemačkom nacističkom vojskom, pokreću veliku ofanzivu protiv slobodne Bihačke republike i cijelog Narodnooslobodilačkog pokreta.

Cilj je potpuno uništenje partizana da bi se spriječilo eventualno iskrcavanje saveznika na Balkanu.

Partizanska vojska probija se prema dolini Neretve.

Budući da se radi o gerilskim snagama, opstanak im zavisi od brzog kretanja, što bi bilo znatno lakše da s partizanima ne ide veliki broj izbjeglica, mahom stariji, žene i djeca iz spaljenih sela, kao i 4.000 ranjenih i bolesnih drugova i drugarica boraca.

Da su partizani ostavili narod i svoje nemoćne drugove, mogli su lakše izbjeći pogibeljnu situaciju kraj Jablanice, koja je zahtijevala i rizičan manevar.

Ali Narodnooslobodilačka borba bila je od samog početka borba za svakog čovjeka, a posebno za one koji se za sebe ne mogu boriti.

**Najveće bitke ne biju se za vlast i teritoriju nego za ljude i to najslabije među njima.**

**Takva jedna bitka bi se danas u našoj zemlji morala voditi svakodnevno - za zdravstvo.**

### Kako se uništava javno zdravstvo u Bosni i Hercegovini

- **Režu se sredstva za zdravstvenu zaštitu** - bolesnim ljudima uskraćuje se liječenje, a aparati i oprema zapuštaju. Očajne ljude namjerno tjeraju u privatne ustanove u zemlji, što javne fondove znatno više košta, ili u inostranstvo, što fondovi izbjegavaju platiti i troškovi padaju na pacijente i njihovo okruženje.

- **Troškove liječenja sve češće snose same porodice koje, radi spasa svojih najbližih, bivaju osiromašene i završavaju u doživotnim dugovima.**

- **Ne ulaže se u obrazovanje** medicinskog kadra niti u istraživanja.

- **Uništavaju se strukovni sindikati i organizacije** tako što ih preuzimaju stranački plaćenici koji unose razdor i strah i tako onemogućavaju borbu za bolje zdravstvo.

- **Zatvaraju se vitalne zdravstvene ustanove** poput dispanzera za žene i školskih dispanzera, pod izlikom smanjenja troškova, a zapravo radi oslobađanja nekretnina i stvaranja tržišta za strane (mahom iz susjednih zemalja i Turske) i domaće privatne zdravstvene sisteme.

- **Medicinski radnici i radnice u stotinama odlaze u inostranstvo**, što naše vlasti dopuštaju a spremno koriste zemlje Evropske unije, poput Njemačke. **U pozadini kojekakvih strategija za navodnu pomoć Balkanu, Njemačka prednjači u kontinuiranom iscrpljivanju javnog zdravstva u Bosni i Hercegovini.**

Time Njemačka krši Rezoluciju Svjetske zdravstvene organizacije o međunarodnim migracijama zdravstvenih radnika i radnica iz 2004. godine i Kodeks Svjetske zdravstvene organizacije o zapošljavanju zdravstvenih radnika van matične zemlje. Ovim dokumentima se razvijenim zemljama nalaže da zapošljavanjem zdravstvenih radnika i radnica iz zemalja u razvoju ne smiju slabiti zdravstvo tih zemalja i moraju kompenzirati štetu nastalu usljed nepravdne tržišne utakmice.

## KAKVO NAM JE ZDRAVSTVO DANAS U BOSNI I HERCEGOVINI?

- ! Zdravstvenu zaštitu nemaju mnogi nezaposleni koji rade povremene poslove ili rade i na crno.
- ! Isključene su gotovo cijele društvene skupine, poput romske populacije, žena koje rade kao domaćice a nisu osigurane u bračnoj zajednici, i dr.
- ! U velikom dijelu zemlje zdravstvena zaštita se dodatno naplaćuje, u vidu godišnjih premija, čak i za djecu i to upravo djecu nezaposlenih.
- ! Esencijalne liste lijekova sve su kraće, a dostupni lijekovi upitnog kvaliteta su zbog manjkavih procedura registracije lijekova.
- ! Operacije i klinička liječenja plaćaju se unaprijed ili se ni ne rade zbog manjka kadra, opreme i prostora, pa bolesni ljudi ovise o humanitarnim akcijama.
- ! Objekti zdravstvene zaštite ne održavaju se i ne obnavljaju u skladu s potrebama ljudi i razvojem nauke i tehnologije.
- ! Ne rade se mnoga životno važna testiranja zbog nedostatka materijala.
- ! Ne rade se redovni sistematski pregledi.

Svjetska banka i Međunarodni monetarni fond tvrde da smo presiromašna zemlja za čak i ovaj znatno smanjeni obim zdravstvene zaštite. Po mjerilima Svjetske zdravstvene organizacije međutim, zdravstvo iznimno siromašne Kube je među vodećim u svijetu. Zato što:  
**Kuba decenijama ulaže u najširu moguću zaštitu svih, prevenciju oboljenja i medicinska istraživanja.**

### Šta je nama potrebno: zaštita prema našim potrebama ili osiguranje prema našoj zaradi?

ZDRAVSTVENA ZAŠTITA	ZDRAVSTVENO OSIGURANJE
- SMISAO = zdravlje pojedinca i zdravlje zajednice kao osnova razvoja svakog ponaosob i cijelog društva.	- SVRHA = profit osiguravajućih zavoda u rukama bogate manjine.
- Temelji se na solidarnosti, univerzalnosti, jednakosti: Doprinosimo svi prema mogućnostima, dobijamo u skladu s potrebama.	- Temelji se na poslovnom rezonu: zdravstvene usluge zavise od količine naplaćenog novca bez obzira na potrebe ljudi.
- CILJ = štiti i liječiti ljude od oboljenja.	- CILJ = ljudima naplatiti bolest i strah od bolesti.
- Garantuje svima jednako sve što zdravstvo jedne zemlje u tom trenutku može pružiti, a to svima znači SVIMA: i stanovnicima i ljudima koji u nevolji potraže utočište u stranoj zemlji (npr. izbjeglice)	- Garantuje samo osnovni minimum svima, ako i to, a sve ostalo - samo prema finansijskim mogućnostima korisnika.
- Razvija medicinu prema potrebama društva.	- Razvija grane medicine i djelatnosti prema potrebama bogatih ili one koje se najbolje mogu naplatiti.

Zaboravile su se danas i ofanzive i oslobađanja teritorija i brojno stanje trupa i komandanti iz Drugog svjetskog rata, ali bitku na Neretvi još uvijek pamtimo kao veliku zato što je bila bitka za ljude koji se nisu mogli boriti za sebe.

**Velika bitka naših dana je i bitka za zdravstvo jednako za sve. Oni koji se mogu boriti - duguju tu bitku onima kojima život zavisi od dobre i dostupne zdravstvene zaštite.**

**LJEVICA u Bosni i Hercegovini danas biće dostojna slavne prošlosti samo ako opet krene u bitke za one koji su nemoćni da se za sebe bore.**